

Naalakkersuisunut apequt: Naalakkersuisut ilaqtariinnut politikki ilaqtariit ataatsimut isingalungit suut anguniarpaat aammattaq ilaqtariit imatut agguarlungit; ilaqtariit pissakinnerusutut, ilaqtariit akunnarttumik isertitallittut, ilaqtariit atungarissaarnerusutut taaneqartartut ?

(Inatsisartunut ilaasortaq, Jakob Skade, Kattusseqatigiit Partiiat)

Akissuteqaat

(Isumaginninnermut Naalakkersuisoq)

Naalakkersuisut Jakob Skade apeqquteqarnera qujassuteqarfigissavaat, tassami taamaaliornikkut isumaginninnermut inatsisini tunngaviumik tunngaviit ilaat pingaarullit eqqartussallugit Naalakkersuisut periarfissinneqarmata.

Isumaginninnermi inatsisini tunngaviatigut tunngavigineqartoq tassaavoq innuttaasut tamarmik imminnut ilaqtaminnullu pilersuisussaatitaanerat, taamaamallu pisortanit ikiuutit, soorlu utoqqalinermi siusinaartumillu pensionisiat, uiusup/nuliaasup imaluunniit inooqatigisap aningaasarsiai tunngavigalugit aalajangersarneqartarlutik.

Erseqqissarneqassaaq malittarisassat atuuttut kingunerissanngimmassuk inoqutigiinni pensionisiallit uiusup/nuliaasup imaluunniit inooqatigisap aningaasarsiai pissutaallutik pensionisiaminnik ilanngaaffigineqartartuni ataatsimut isigalugu appasinnerusumik aningaasarsiaqartarmata pensionisialinnut appaaffigineqarneq ajortunut naleqqiullugu. Killormulli pisoqarpoq. Siusinaartumik utoqqalinermilu pensionisiallit uiusup/nuliaasup imaluunniit inooqatigisap aningaasarsiai pissutigalugit pensionisiaat appartinneqaraluartut aappariit ataatsimoorlutik inoqutigiinni aningaasarsiaat suli inoqutigiinnit pensionisiaminnik ilanngaaffigineqarneq ajortunit qaffasinnerupput.

Inoqutigiit aningaasarsiaat allanngussagalarpata inatsisini massakkut atuuttuni naatsorsueqqinnissamik periarfissiisoqarpoq, taamaaliornikkullu inoqutigiit massakkut aningaasarsiaat aallaavigalugit pisortanit ikiuutit aalajangersarneqarsinnaallutik. Tassalu Jakob Skade-p ujartugaatut kommunit taamatut periarfissaqartuarput ilaqtariinni ataasiakkaani ilimaginngisamik allannguuteqartoqarnissaa eqqarsaatigalugu.

Taakku saniatigut pisortanit ikiorsiissutit aamma siusinaartumik utoqqalinermilu pensionisiat tunniunnerannut atatillugu kommunit inunnut ataasiakkaanut aningaasaqarnermikkut immikkut ittumik ajornartoortunut tapiissuteqarnissaminnut periarfissaqarput.

Utoqqalinermi siusinaartumillu pensionisiallit ilaqtaminnik najugaqateqarnertik pissutigalugu pensionisiaminnit ilanngaatsinneqartartunut Jakob Skade-p assersuteqarnera eqqarsaatigalugu tikkuartariaqarpara, pensionisiat aningaasartaat meeqqat inersimasut imaluunniit ilaqutaasut inisimasut aallaavigalugit aalajangersarneqarneq ajormata, kisiannili uiusup/nuliaasup imaluunniit inooqatigisap aningaasarsiai kisiisa aallaavigalugit.

Akerlianilli meeraasut inersimasut imaluunniit ilaqutaasut inisimasut aningaasarsiaasa pineqartup utoqqalinermi imaluunniit siusinaartumik pensionisiaqartup ineqarnermut tapiiffigineqarnera sunniuteqarfigisinnaavaat. Aallaaviatigut isumaqanngilanga tamanna ajornartorsiutaasoq, tassami ilaqutaasut inisimasut namminneq aningaasarsiaminnik

soorunami ineqarnermut akiliutitut tapiissuteqarsinnaasariaqarmata, taamaalillunilu ajornartoorneq annikillisillugu.

Taamaattorli Naalakkersuisut maluginiarpaat pisortat ikiuutaasa akornanni ajornartorsiutinik takkuttoqarsinnaasarmat, taamaammallu akileraartarnermut atugarissaarnermullu isumalioqatigiissitap suliassaasa ilagissavaat pisortanit ikiuutit, akileraarutit ilusaasa il.il. akornanni misissuinissaq. Tamatuma kingorna Naalakkersuisut isummerfigissavaat sutigut isumaginninnermut inatsisini allannguuteqartoqarnissaa pisariaqarnersoq.

Taamaattorli allannguuteqassappat pissakilliornerit iluaquserneqarnissaat Naalakkersuisut politikkeriuassavaat.